

5. aoust 1627.

Vingt huit.

# DECLARATION D V R O Y

Contre le Sieur de Soubize, & autres ad-  
herants au party des Anglois. Confir-  
mant les Edicts de Pacification, en fa-  
ueur de ceux qui demeureront en leur  
devoir & obeissance.

*Donné à Villeroy le 5. Aoust 1627*

*& Publiée en Parlemēt le 12. Aoust audit An*



A PARIS,  
Par A. ESTIENNE, Premier Imprimeur &  
Libr. ordinaire du Roy, rue S. Jacques, au  
College Royal, deuant S. Benoist.

---

M. DC. XLIV.  
*Avec Privilège de sa Maesté.*



**L**ouis par la grace de Dieu Roy de France & de Nauarre, A tous ceux qui ces presentes Lettres verront, SALVT. Depuis qu'il a pleu à Dieu nous appeller au gouuernement de cét Estat, nostre conduite a fait cognoistre, avec combien de soin nous auons travaillé pour entretenir la paix & la tranquillité publique, soit en gardant & conseruant entre ceste Couronne & les Princes estrangers toute bonne amitié, intelligence & correspondance, soit employant comme nous auons fait diuerfes fois en plusieurs endroicts & grandes occasions, nostre entremise Royale pour assoupir & esteindre les alterations & differends qui s'estoiēt émeus entre lesdits Princes: comme aussi en donnant assistance & protection à nos anciens Alliez, lors que nous l'aũs iugé necessaire pour les maintenir ou reſtablir dans les choses qui leur appartenoient, afin d'arreſter par ce moyen, la ſuite des troubles que les innouations Arriuées en leurs Estats pouuoient apporter. En quoy ſi nos intentions ont eſté recognuës bonnes & ſinceres, nous eſtimons auſſi que celles que nous auons eu, fondées ſur les meſmes conſiderations de la tranquillité publique & de l'aſſermiſſement du repos de nostre Royaume, en contractant diuerſes grandes alliances par le mariage de nos tres-cheres Sœurs, ſont dignes encores de plus grande recommandation. Mais nous ne pouons voir ſans vn tres-iuſte,

sentiment, que la dernière que nous auons faite en Angleterre, n'aye pas eu iusques à present le bon succez que nous en auions attendu : Et qu'au lieu d'estreindre de plus en plus comme nous nous estions promis, le nœud de l'ancienne amitié qui estoit entre ces deux Couronnes, il soit arriué qu'après les infractions notoirement faites de la part d'Angleterre, aux articles du mariage de nostre tres-chere Soeur avec le Roy de la grande Bretagne, les Anglois soient encor venus assaillir & faire descente en l'Isle de Re, avec nombre de vaisseaux & gens de guerre, sans nulle cause, fondement, pretexte ny declaration. Et comme nous voyons que pour donner cours à leurs iniustes desseins, ils ont déjà pratiqué aucuns de nos subiets, ont enuoyé le Sieur de Soubize en nostre ville de la Rochelle, pour induire les habitans d'icelle a se ioindre à leur party, & qu'ils continuent les mesmes menées & pratiques à l'endroit de nos autres subiets de la Religion pretendue reformée, pour les attirer & engager sous diuers pretextes & vaines esperances dās leur vniō. encores que nous voulions croire, que nosdits subiets aurōt assez de fermeté & de iugement pour ne pas se laisser decenoir & surprendre à semblables artifices: & que considerans que nous les faisons iouyr en paix de la liberté toute entiere de l'exercice de leur Religio, du benefice de nos Edicts, & des choses qui leur ont esté par Nous promises, ils scauront bien cognoistre que ceste entreprise faite par les Anglois, ne peut auoir en effect aucun obiet ny fondement qui puisse regarder le bien de leur Religion, mais

3  
quec'est vne volontaire aggreſſion contre, Nous,  
contre ceſte Couronne, & contre l'honneur de la  
Nation, pour la deſenſe deſquels tous bons Fran-  
çois tant Catholiques que de la Religion preten-  
dûe reformée, ſont également obligez d'expoſer  
leur ſang & leur vie enuers & contre tous: Ne-  
anmoins afin que noſdits Subiets ſoient informez  
de nos intentions ſur les occurrences preſentes, &  
qu'ils ne puiſſent eſtre circonuenus par les inuentiōs  
qui ſont employées pour les ſouſtraire de leur deuoir  
naturel, SçAVOIR FAISONS, que Nous pour ces  
cauſes & autres bonnes & grandes conſiderations  
à ce nous mouuans, DE L'ADVIS de la Royne  
noſtre tres-honorée Dame & Mere, de noſtre tres-  
cher & tres-amé Frere vnique le Duc d'Orleans,  
des Princes, Officiers de noſtre Couronne, prin-  
cipaux Seigneurs & notables perſonnages de no-  
ſtre Conſeil d'Eſtat, & de noſtre certaine ſcience,  
plaine puiſſance & autorité Royale, AVONS dit  
& déclaré, diſons & declarons par ces Preſentes  
ſignées de noſtre main, le Sieur de ſoubize, &  
ceux de nos Subiets de quelque qualité & condi-  
tion qu'ils ſoient, qui auront adheré, ou qui ſe  
joindront au party des Anglois, qui les fauoriſerōt  
& aſſiſteront directement ou indirectement, au-  
ront accez & intelligence, aſſociation & corres-  
pondance avec eux en quelque ſorte & maniere  
que ce ſoit, ou qui autrement ſe d'epartiront de  
l'obeyſſance qu'ils nous doiuent Rebelles, Trai-  
tres & Perfides à leur Roy, & Deſerteurs de leur  
Patrie, Criminels de leze-Maieſté au premier  
Chef, & comme tels declarons leurs biens, meu-

bles & immeubles, Offices & Charges à nous acquis & confisquez : Et tous les Habitans de nos Villes qui adhereront aux entreprises, rebellion & desobeyssance des dessusdits, ou qui leur donneront entrée, passage, refuge, retraite & logement en icelles, & qui les y souffriront & assisteront en quelque sorte que ce soit, leur aideront d'armes, viures & munitions, & autres choses quelconques; coupables des mesmes crimes, decheus de tous oëtroys honneurs, priuileges, franchises, immunitez & droits qui leur pourroient auoir esté concedez par les Rois nos predecesseurs ou par Nous, sans esperance d'aucun reſtablishement. Voulans qu'il soit procedé contre-eux selon la rigueur de nos Ordonnances, par emprisonnement de leurs personnes, saisies de leurs biens, raselement & demolition de leurs maisons, sans aucun excepter, degradation des bois & autres choses qui en dependent, & qu'ils soient décheus du benefice de nos Edicts, mesme du renuoy en nos Chambres creées par iceux, sauf si dans huit iours apres la publication faite de ceste presente Declaration es costes de Poictou, Xaintonge & Aulnis, ils ne se départent de la ditte rebellion, & se representent deuant nos Officiers de Villes des Xaintes, Nyort, Fontenay, Brouage, & autres plus éloignées, avec les submissions ordinaires, & que les Villes ne fassent les Declarations en tel cas requises dans ledit temps. Et d'autant que nous auons reconnu durant les derniers mouuemens, qu'aucuns de nos Subiets de ladicte Religion pretenduë reformée adherans au party des rebelles, ont de

costume d'enuoyer leurs enfans, ou permettent  
 qu'ils aillent porter les armes avec eux, demeurans  
 de leur part en leurs maisons pour les garentir de la  
 rigueur de nos Declarations, Nous voulons pour  
 remedier à tels abus, que les Peres ou les chefs des  
 maisons & familles, soient tenus & reputez pour  
 adherer au party des ennemis, & qu'ils soient pu-  
 nis en leurs personnes, biens & maisons, des pei-  
 nes mentionnées en ces presentes, si leurs enfans  
 ou autres parents demeurans ordinairement ou le  
 plus souuent en leurs maisons, & n'ayans autre  
 maison de leur chef que celle de leurs peres & pa-  
 rens, y sont portans les armes, si ce n'est que les-  
 dits Peres ou chefs de familles & maisons, nous  
 seruent actuellement dans nos armées ou ailleurs,  
 & facent telle diligence de retirer leurs enfans ou  
 parens, que nous ayons tout suiet de croire qu'ils  
 n'y ont aucune part. Et pour le regard de tous nos  
 autres subiets de la Religion pretendue reformée  
 qui demeureront en l'obeyssance & fidelité qu'ils  
 nous doiuent, sans adherer aux desseins des enne-  
 mis, & autres pratiques, factions & menées con-  
 tre nostre autorité, seruice & repos de nostre  
 Estat, Nous voulons qu'ils iouissent plainement  
 & paisiblement de la liberté de leur exercice, &  
 de toutes les graces & concessions à eux faites &  
 accordées par le feu Roy nostre tres honoré Sei-  
 gneur & Pere & Nous, lesquelles nous entendons  
 garder & entretenir inuiolablement, mettant tous  
 nosdits Subiets de laditte Religion pretendue re-  
 formée, leurs familles & biens, demeurans en  
 leur deuoir, en nostre protection & sauue garde  
 speciale.

SI DONNONS EN MANDEMENT à nos amez & feaux les gens tenans nos Cours de Parlements & Chambres de l'Edict, que ces Presentes nos Lettres de declaration, ils facent lire, publier & enregistrer, & le contenu en icelles faire garder observer & executer exactement selon leur forme & teneur, mesmes à nos Cours de Parlements, pour le regard de l'execution & infliction des peines portées par ces Presentes, pour raison desquelles Nous leur attribuons toute iurisdiction & cognoissance priuatiuement ausdites Chambres pour les cas susdits, dont les coupables sont indignes & décheus de tous priuileges. Sans preiudice neantmoins de ceux qui seront pris par les Generaux & Chefs de nos Armées, Iuges de nos villes & Iurisdiccions, les Visbaillifs, Visseneschaux & Preuosts de nos chers & bien amez cousins les Mareschaux de France, desquels nous voulons que iustice soit faite promptement & sans remise, tant sur les personnes que sur les maisons & biens, par ceux qui les auront pris & arrestez en quel que lieu que ce puisse estre, & qu'ils soient punis & chastiez selon le contenu en ces Presentes, & la rigueur desdits Edicts & Ordonnances precedentes faites par les Roys nos Predecesseurs & Nous, & à cette fin que les procez leur soient par eux faits & parfaits selon la iurisdiction à eux attribuée: Enioignons à nos Procureurs generaux & leurs Substituts, de faire toutes poursuites & diligences pour ce requises & necessaires. Mandons aussi aux Gouverneurs & Lieutenans generaux de nos Pro-

7  
uinces, Baillifs, Seneschaux, Vissenechaux, Pre-  
uosts de nosdits cousins les Mareschaux de Fran-  
ce ou leurs Lieutenants, & tous autres nos Iusti-  
ciers, Officiers & Subiets qu'il appartiendra, de  
tenir la main à l'exécution de ces Presentes, faisant  
saisir & arrester, courir sus & tailler en pieces, tous  
ceux de nos Subiets qui feront leuées & armemens  
de gens de guerre soit par mer ou par terre, sans nos  
Commissions seellées de nostre grand seau : CAR  
tel est nostre plaisir. En témoin de quoy nous auons  
fait mettre nostre seel à celdites Presentes. DONNE  
à Villeroy le cinquième iour d'Aoust, l'an de grace  
mil six cents vingt sept : & de nostre regne, le dix-  
huitième. Signé, LOUIS, Et sur le reply, Par le  
Roy, DE LOMENIE. Et seellées du grand Seau de  
cire iaune. Et encor sur ledit reply est écrit.

*Leues, publiques & registrees, oüy & cerequerant le  
Procureur general du Roy, pour estre executees gardées  
& obseruées selon leur forme & teneur, & que coppies  
collationnées aux originaux d'icelles, serot enuoyees aux  
Bailliages & Seneschauſſees de ce ressort, pour y estre  
pareillement leues, publiques, registrees, gardées & obser-  
uees à la diligence des Subctiuts dudit Procureur Gene-  
ral, ausquels enioinct d'y tenir la main, & certifier la  
Cour auoir cefait au mois. A Paris en Parlement le  
12. d'Aoust 1627.*

Signé,

DV TILLET.